



Jubiläums- Schnitzelbank

30 Jahre Fasnachtsgesellschaft Muotathal 1978

Mier möchtid üch all wieder rächt härzli begrüässä,
au diä wo nüd hend chönnä cho uf ihrnä Füässä.
Agfangä hed där Tag hüt bsunders guät,
drum lüpfid mier vor allnä grad dr Huät.

Glück im Schlaf hed der Bürschtl gha,
susch hätt är ds'Auto im Klingätobul undä la stah.
Am Morgäd hedä duä einä mitum Lastwagä usäzogä,
wänns alig nüd sött uscho isch das alig nu ä chogä.

Ä schönä Doldä hed si gha di säb Tannä,
dr säb hedr midum gnu, derna ischär gangä.
Däs ganz Trämäli hed är eifach la si,
s'isch im Thal innä, und nüd s'Gersau gsi.

Das Schueltaxi isch au ä Sach,
gä heds dersusä au Krach.
So öppis sött doch sicher nüd si,
miär läbid schliässli inärä Demokratie.

Diä Nidlä isch duä glich nu gratä,
au wänn der alt Muätitaler Tokter hed müässä wartä.
Ä so chas halt ga mit alter Ruschtig,
die meischtä heds aber tunkt ender luschtig.

Sälber ghörig luägä choschtäti meischtens nüd,
ämal weniger als dr Rat vo dä Nachbuurslüüt.
Dr Tokter im Tierspital s'Züri heig do gseid,
das Chuäli muäss nüd chalbärä, gand nur wider midum hei.

Stiful heigär agha, äs isch dä wahr,
däs ganz passiert ufum Heiwäg vodr Moosfahrt.
I dä Sockä isch är gangä dr guäti Maa,
willär zünftig, schins, heig Brisä gha.

Äs Buuwärch isch äs schöns fürwahr,
drum hends gwärchät medä äs Jahr.
Mängä duäd jetzt gärä ufs Rotliecht verzichtä,
und wider i eim Rutz über Föllmisbrügg flitzä.



Der Älpler hed dänk gha Chüä medä vier,
mit einerä sinds duä nämä zum Stier.
Dr Chnächt hed duä di Lätz brungä,
dr Stier heig duä än anderi gschprungä.

Ä Buur wiä söttmä der ächt tufä?
är isch uf Zug apä ä 90kilönägä Chäs go chaufä.
Ufum Autodach obä heig mänä chönnä gschauä,
abladä hedärä nümme mögä, är hedä duä drfobä verhauä.

Nach dä Zwölfä söttmä als Wirt me verliidä,
und nüd d'Gescht mit Schleg vertribä.
Dr Wirt hed ä dem Burscht a Grind anägschlagä,
isch ächt im nüd gsi dr grösser Schadä?

Sylväschter fiirä hends wellä uf dr Glattalp,
bim Sännäbrunnä obä hends gmacht ä Halt.
Einä hed duä gmerkt dass är da obä nüd cha wiibä,
drum hedsä grad afä durapä triibä.

Mit dä Jungschwinger isch nüd ds gschpassä,
bsunders wämä muäss mitnä zämäfassä.
Ds Plagiärä heds nüd verlitä,
bsunders wänn är Zug für Zug muäss unterligä.

Ä schönä, jungä, chächä Burscht,
hed mängisch ä chli Durscht.
Schtarch machid in s'Rockersgwändli,
är schlad allig zämä äso elteri Männdli.

Ä Hochzigfotograf sött äso öppis scho merkä,
dass i der Kamera innä kei Film duet steckä.
Bilder hends jetzt keini vom schönschtä Tag im Läbä,
Ischt der Fotograf ächt cho flätt vergäbä?

Mier hend einä im Thal är tued nu ä chli ufpassä,
äs wär gschieder är tät öppä einisch jassä.
Wägumä Winterwägrächt tued är sich wehrä,
äs isch nur zhoffä, di anderä tüägädä cherä.

Dr Fuessballklub isch Finanziell schwach,
und sportlich gseh nu nügger starch.
Ä Platz hends chönnä erzwingä,
mä wirdnä dr Sprützbrunnä im Platz nüd vergönnä.

Diä glungnig Moosfahrt isch gangä guät verbi,
mängä hed verwutscht Zopf, Kaffi und Wii.
D'Fasnachtsgsellschaft duäd allnä dankä,
wo gschpändät hend diä Stundä und Frankä.



Vögel gschossä hends scho vor hundert Jahrä,
das hätt eini scho anä achzäsibänäsibäzgi chönnä erfahrä.
Im Wigätli vor hends wellä go chlädärä,
gschtobä hend duä nüdämal d'Fädärä.

Der Maa isch usinnig gschickt,
redä duäd är grad verzwickt.
Am Morgäd duäd är mängisch lang schlafä,
aber d'Schüeler düänd scho ufä Lehrer wartä.

Das Meitli hed übercho äs gschwulläs Chnü,
umägfahrä ischt är midärä bis am drüü.
I der Märchtstrass hedsä do gleitig bschtellt,
willum einä z'Auto hed zmizt id'Schtrass inä gschtellt.

Au üsi GV isch ribigslos verlaufä,
nur einä duäd bim Jassä ras z'Täfäli butzä.
Grad ä paari hed är mögä verschla,
der guäti Jasser und Schryber-Maa.

S'Gmeindshuus isch ä so öppis,
nu medä z'Schwyz prichtiz vo söttigs.
Zweimal hed das ä Abschtimmig koschtät,
zletscht hednä do dr Regiärigsrat z'Inventar poschtät.



Figgäd Mühli hed einä gha im Bödäli hindä,
är isch inägschtigä ohni lang sich's bsinnä.
Dr Gräüflä-Maa hättä duä nu chönnä schtörä,
das det hani morädis scho müässä ghörä.

Wellä vo denä zwee hedächt vorigs z'Loo?
Bis jetzt hend glaubi bed nu gnuäg übercho.
Ich tät änand niämi s'Gsicht verschla,
susch chönnt äso ä Grind nu tüür cho z'schtaa.

Im November isch scho schier Winter wordä,
z'Schwarzpfluägä macht a öperum Sorgä.
Uf Glattiis duäts halt nüd verlidä,
äso cha mängä wider sis Auto abschriebä.

Äso ä Schwyzer-Sännächilbi dued eim guet,
wämä überhund Kaffi und Brissago gnuet.
Äs heds do eini müässä erfahrä o Herrje,
glandät ischi duä dr langäwägät im VW.

Di Jungä söttid si ä chli meh wehrä,
wänns di anderä Schuelgoofä wend verzehrä.
Diä Elterä hend do d'Chiläbrügg wider müässä verlaa,
d'Schuelgoofä heigids duä scho gschspannät gha.

Ä chreftigä Burscht das muäsi sägä.
am Musigbox isch är wit überlägä.
Är hed duä grad Geburtstag gha,
drum tuäd är halt i Chaschtä inä stah.

Ä Gschäftsmaa und ä Holzer düänd resigniärä,
d'Wahrheit sägä chamä oni sich z'schiniärä.
Mit nörgälä sinds cho bis vors Gricht,
das Gäld wott är trotz derä langä Gschicht.

D'Schützäveteranä sind z'Chlotä der Flugplatz go aluägä,
aber ohä uf der Kontrollä hendsis duä gnau afä untersuächä.
Si sind ufgfallä wiä gfährli Terrorischtä,
d'Munition hends mit zantä Tschöpä müässä la ligä.

Wer wott dä scho verussä raschtä?
Wämä i der Hüttä zahlt hed z'übernachtä!
Dr Hüttäwart duäd d'Wirtschaft früäner verlah,
drum hendsum Türä müässä inäschlah.

S'Autofahrä äs mags nüd jedä glehrä,
susch chönnt är idr Suworovbrügg undä cherä.
Der Burscht muäs ha grad ä chli z'Loh,
suscht chönnt är nüd einä us dr Garasch lachoo.

Wänn einä äs Instrumänt duäd schpilä,
isch sicher das schönscht idr Chilä.
Ä Gmeindrat hed ums wellä verbütä,
aber wänn drsälb tät schpilä, ghörtämäs höchstens lüütä.

Ä Burscht verliids nüd wänns ä neckid,
dä findt är sich bsunders sexy.
Glachät heigid ä paar nu nüd schlächt,
wä mä weis wers gsi isch gid mänä rächt.

Im Sunnähalb äs isch zum lachä,
da duäd einä ä Buckä machä.
La lochä duäd är wiä nüd gschid,
bis um Gadämurä is Loch inä ghid.

Wettkämpf gits afäd allerhand,
go mäiä sinds inäs anders Land.
Dr 27. Rang hed dr Schwyzermeschter gha,
einä hed sich aber d'Suberkeitsmedailä nüd la entgaa.

Jetzt müend mier halt wieder gah,
öppä imä Jahr sind mier wieder da.
Aber dänkid üs midumä Bitrag dra,
äs gad lang, bismäs wieder a eim preichä cha.

